




## Comunicado di Prensa

### Desaroyo economico den e di cuater kwartaal di 2006

Oranjestad, 09 Mei 2007 - E publicacion "Economic Profile" ta analisa e desaroyonan economico mas relevante di cada kwartaal desde aña 1998 te cu di cuater kwartaal di aña 2006. E publicacion ta dividi den dos parti. E prome parti di e relato ta elabora riba diferente actividad economico di nos pais manera Comercio, Hotel y Restaurant, Construcción, Transporte, Almacenahe y Comunicacion. Den e parti aki ta revela informacion tocante e desaroyo di cada actividad economico, mientras cu nan ta wordo presenta den un indice basa riba indicadornan relevante pa cada actividad.


Den e di cuater kwartaal di aña 2006 e indice partial di e actividadnan economico ta muestra un bahada di 4.4 porciento compara cu e mesun kwartaal den e aña anterior. Esaki ta debi na e bahada di 31.7% den valor di importacion di material di construcción relata na e actividad economico "Construcción" y tambe na e bahada di 6.0% den gasto di personal relata na e actividad economico "Administracion Publico & Educacion".



### Servicio di utilidad


Durante e di cuater kwartaal di 2006, produccion den e industria di Utilidad a crece cu 7.9% compara cu mesun kwartaal di e aña anterior.

E crecemento aki ta debi na un subida den produccion y distribucion di awa, coriente. Ademas e consumo di gas a subi cu 1.2% compara cu e mesun kwartaal di 2005.



### Construcción


Den e di cuater kwartaal di 2006, e industria di construcción a conoce un bahada di 31.7% compara cu e mesun kwartaal di e aña anterior. Esaki ta debi na un bahada den valor di importacion di materialnan di construcción compara cu e di cuater kwartaal di 2005. Valor di importacion di material cu mas a baha ta "ironworks, pipes, barrels, bolts, etc." cu 79.5% y importacion di "cement" cu 22.7%.







## Transporte

Actividad den e sector di transporte a crece durante e di cuater kwartaal di 2006 cu 7.3% compara cu e di cuater kwartaal di 2005. Esaki ta debi principalmente na un subida den e cantidad vuelonan comercial pa Aruba y tambe e cantidad y contenido di barco cu ta drenta hafnan di Aruba. Di otro banda, e cantidad di pasajero cu ta hasi uso di transporte publico a conoce un bahada di 9.8% compara cu e di cuater kwartaal di 2005.



## Housing

Den e di cuater kwartaal di 2006, e industria "Housing" a crece cu 3.1% compara cu e mesun kwartaal di aña pasa. E indicador usa pa calcula e industria aki, cual ta e cantidad di parcela connecta cu WEB, a subi na un total di 35.989. Den e mesun periodo di 2005, esaki tabata un total di 34.905 parcela.




## Sector publico

### Administracion publico

E actividad den e industria di administracion publico y educacion a registra un bahada di 6.0% compara cu e kwartaal similar di 2005. E gastonan di salario den e sector aki a baha compara cu e di cuater kwartaal di 2005.

### Entrada y gasto

Entrada total di gobierno a baha cu 4.5% of Afl. 9.6 miyon compara cu mesun kwartaal di aña anterior te na un total di Afl. 205.2 miyon. Entrada di balasting directo a baha cu 2.2%, principalmente door di menos entrada di winstbelasting y loonbelasting. Sinembargo, belasting indirecto a subi 12.7% compara cu e mesun periodo di 2005. Entrada di otro belastingnan tambe a conoce un bahada di 56.0% compara cu e di cuater kwartaal di 2005. Gastonan durante e di cuater kwartaal di 2006 ainda no ta conoci.



### ***Inflacion***

Na fin di December 2006, inflacion na Aruba a baha cu 1.1% compara cu fin di september 2006. Contrario na un año prome, durante e mesun periodo di 2005, inflacion tabata (+)0.5%. Compara cu december 2005, prijs na Aruba a aumenta cu 2.5% na december 2006.

Den e di dos parti di e Economic Profile por haña tabelnan relevante pa e economia di Aruba. Esaki ta cubri datonan fiho di indicadornan economico manera, por ehempel, servicio di utilidad, construccion, turismo, transporte aereo, maritimo y terestral, entrada di impuesto directo y indirecto, hipoteca, importacion y exportacion di mercancia, cantidad di compania y mucho mas.

E dos ehempelnan presenta ta duna un indicacion di e contenido di e publicacion Economic Profile. Tambe por haña informacion mucho mas detaya di indice di prijs di consumo, turismo, importacion y exportacion di mercancia, empresa y aspectonan internacional. Tur esaki for di año 1998 te cu di cuatro kwartaal di año 2006.

CBS ta spera cu e informacion aki lo aporta na e informacion busca y uza pa e comunidad y cu asina por duna sosten na e desaroyo di Aruba. Personanan y instancianan interesa den e publicacion por tuma contacto cu Centraal Bureau voor de Statistiek, na Sun Plaza Building, tel. 583-7433, fax 583-8057, e-mail: [cbs@setarnet.aw](mailto:cbs@setarnet.aw). Personanan di contacto: Sr. Herby Kock of Sra. Roslyn Salas-Vrolijk.

